

KII DAUDA



The history of King David in Sãngã, as recorded in the books of the prophets: 1 Samuel 16 – 20 and 2 Samuel 1 - 12.

Sama'ila lalahu mahebo

Sama'ila yǎo kaana Dauda miima

Baanaje hè Sama'ilan: Ní oa Saulu yǎaji ha dii kpashe? Ma gè ì kiike Isra'ilaãma. Nè yǎo kaa béé hwa, n da zεema. Ma n jǐ Baitalami gbǎn Yeshe gu, dun ì ni doo maa bòbii ì gō kii. Di Sama'ila kè: La di má kea mà wee gube? In Saulu mà, ì ma dea. Di Baanaje kè'in: Nè dii nuhe shi n weezo, n ke n nù n sangakezomεε. Nè Yeshe shishi sanga be keaũ, ho tá n kea má heamii, n yǎo kaameε gbǎn miima tá má mεamii.

Yǎa tá Baanaje hè Sama'ilan ibe hè. Tá ibi booda Baitalami, hwaa be gbǎnkpassǎ wèe kōtaji'izo. À wasaamà, di à ì làla à kè: Lahia n nù guia? Ì kè: Lahia. Ma nù sangakeji Baanajen. À gbǎshǐbo a gindema, à weemazo sangakegu. Di ì gbǎshǐbò Yeshe n ì nōgōniazo, ì à shìshi sangakeãu. Tá à bòo, Sama'ila Eliabu wà, di ì bēdà ì kè: Gbǎn tá Baanaje shì di gōo ì εε gube. Di Baanaje kè'in: Mba ì waũ ko ì saake wadɔa, ma gè'iji. Mabata gbace wa lata gbǎia ta gbace waa. Gbace ta gbace wa ì jìima, maakĩn, zūu mata wa. Di Yeshe Abinadabu shìshi, ì nù Sama'ila εε, di ì kè: Baanaje tà gbǎn dii bobiida. Di Yeshe Sama shìshi, ì nù Sama'ila εε mɔɔ, di ì kè: Baanaje tà gbǎn dii bobiida. Di Yeshe ì ì nōgōni gbǎn schia shìshi, à nù Sama'ila εε, di ì kè: Baanaje tà à gbǎnkee bobiida. Di ì Yeshe làla ì kè: N jingē leekpεε di guia?

Ì jinshì'in ì kè: À gbān kpéebo ba bee guiida, ibi tãa dāa. Di Sama'ila kè'in: Ñ gbānkee jĩ ì shishiji. Wába sangakeaa ha ì nù guii. Di ì gbānkee jĩ ì gu, ì nù. Ni be gbān cēn, ì wie yāazo mɔɔ ì waũ yāazo. Di Baanaje kè: Ñ kpatɛ ñ yǒɔ kaa ì miima, dun ãa di bee. Di Sama'ila bée be shì ì yǒɔ kàa ì miima ì dajiã ɛɛũ. Tun dii be Baanaje Tãa dà Daudan. Bee kpɛ Sama'ila ladì ì wèe Lama.

Dauda jĩikeã Saulun

Baanaje Tãa kàta Sauluma, di Baanaje tò jii zɛzɛ nù'ima. Ì ɛɛkenaa kè'in: Lakii tò jii zɛzɛ nù'mma. Lata lee Baaba, ñ to wāa n ɛɛkenaa wà gbān gude tá doma zẽ. Kobusa in Lakii tò jii zɛzɛ be shìa'mma, ita doma demii, dun ñ daamata. Di ibe hè ì ɛɛkenaan: Gbān tá doma zẽ gbagba à gude à nu'izo ma gu. Di ì ɛɛkeda kee kè'in: Ma Baitalami gbān Yeshe ni kee wà, ì doma zẽ. Zũugbadanaje jẽekedan, mɔɔ ì yāahe zẽ. Jinge yāan, mɔɔ Baanaje bee'izo. Di Saulu gbāia jĩ Yeshe gu, à kè'in: Saulu kè n ni Dauda tá ta tãana dā ñ ì jĩmɛɛ.

Di Yeshe ihoka dà jekin inabi'izo tɔɔ doo beekuhe bɔtɔnizo, ì ì ni Dauda jĩzo Saulun. Tá ì bòo Saulu gu, ì gǒ ì jĩikeda. Saulu yaa'iji gbagba, di ì ì dà ì jẽekehoākũda. Di Saulu gbān jĩ Yeshe gu ì kè: Ñ to Dauda gɔ ma jĩikeda, dun ì yāa ta kemɛɛ. In Lakii tò jii be shìa Sauluma, di Dauda ta ì doma shi ì de'in. In jii be wèe, di ita daamata, ita shi ì miiladima.

Dauda Goliatizo

Filishitiã à jěkenaa hàkõ, àbi jěe shiikea Soko, Yahuda teeũ, di à gaa jè Efedamimu, Soko zãaũ Azekazo. Saulu Isra'ilaãzo kìn à hàkõ à gaa jè Ela gu'intɛenaũ, àbi shiikea à wee jěekeji. Filishitiã bee kasama kawa be, Isra'ilaã bee kasama kawa dii, gu'intɛena bee à zãaũ. Di Gata jěenaje tá wàta ke Goliati bò Filishitiã gaaũ. Ì saake bòo ookūsū sobodoo. Ì mɔɔcɛ fula gǎ, mɔɔ mɔɔcɛ tɔɔ tá bee doo zɔɔbakazo ibe gǎ, ì gbitee kilo ka'aa. Ì mɔɔcɛ bɔɔgɛ gǎ, mɔɔ ì mɔɔcɛ shinge lòko ì ɛema. Ì shinge kũ, ì ba bee doo bashetāda gaama. Ì wée gbitee kilo schia. Ì matashikūda bi taa ì ɛɛ.

Goliati gǔɔ, di ì leezù Isra'ila jěenaama ì kè: Budikpaaji a bò jěezo? Atà dɔ maa Filishitindaa? Āakìn, Saulu zɔɔna. À gbānkee gude a bii ì intɛ ì nu ma gu. In ì zāia ì jěekemazo, in ì ma dè, ma gbāia gǔa a zɔɔna. In maa di ma ì dè kìn, á gǔa wa zɔɔna, á zɔɔkɛawɛ. Di Filishiti be ladì ì kè: Mabi shīnlelagoa Isra'ila jěekenaama kpāia. À gbān gudɛmɛ wà jěeke kōzo. Tá Sauluzo Isra'ilaãzo kōn à ì yǎa be mà, à tòsǎ, à zūu kàta.

Dauda Efelata gbān Yeshe nin. Yeshe Baitalami gbānn tá bee Yahuda teeũ. Ì nɔgɔɔnia ɛ gbān sɔbo'aa, mɔɔ Saulu dii Yeshe gbānkpasani, ì kpasakè putuputu. Ì ni gbada àa bee jěekegu Sauluzo. Ì nɔgɔɔni mahɛbo to Eliabu, ì hwaabɔabo to Abinadabu, ì aabɔabo to Sama. Dauda Yeshe ni gbān kpɛɛbon. Ì dajiǎ be dò Sauluma, di ña ta wee Saulu gu, ita ladi ì shi Baitalami ì je tāana

dāji. Filishiti be ta bo ì ì ginde mɔ'ɛɛ saazo egeezo ha dii kahwaa.

Dii kee Yeshe hè ì ni Daudan: N̄ wie kpateã hè doo dii shi ihoka wokoi diizo n̄ weezo hidahida n dajiān à gaaũ. N̄ diō hiihiina wokoi dii shi n̄ kpa à kee ɛkedama. N̄ wee n̄ à wa in à lahia, n̄ shi à lahia labaiizo. À bee Sauluzo Isra'ilaãzo kōn Ela gu'intɛɛnama, àbi j̄ɛkeɛa Filishitiāzo.

Dauda kpàtɛɛ sasaa, ì ì t̄āana tò t̄āadāda keen. Ì ì aso shì, di ì dà zɛɛũ lata Yeshe j̄ɛ'in. Tá ì bòo j̄ɛkenaa gaaũ, àbi wada j̄ɛkeɛgu, àbi o'oa gbagba. Isra'ilaã Filishitiāzo àbi shiikea à ɛɛdò kōma. Di Dauda ì aso nà hoã dādan ì ooũ, di ì baashì ì wèè j̄ɛkeɛgu. Ì ì dajiā tà gube, di ì hookpà'àma. Tá ibi ȳaahea'àzo, Filishitiā j̄ɛɛnaje Goliati, Gata gb̄ān bò Filishiti j̄ɛkenaaũ, ì ladì ì kpàtɛɛ ì ȳāa bezo. Dauda ȳāa be mà. Tá Isra'ilaã Goliati wà, à zūu kàta mɔɔ, à wàzā kōma kōn. Àbi hea kōn à kè: Atà gbace be wa tá ì bòa? In ì bò, ita sh̄īnlelagowama. Gb̄ān tá ì dè, kii ĩa gbaa oohe gba, ì ì gbaa ì nene mɔɔ nɛ, mɔɔ ì baa gb̄āia ba t̄ɛ'ia kpaa mɔɔda.

Di gb̄āia tá ḡɔɔ lɛɛ ì sɔ Dauda à làla ì kè: La di wà kea gb̄ān tá Filishiti be dè ì Isra'ilaã bò ũu? Ji di Filishiti zumbanaje be tá ì sh̄īnlelago Lakii betekenaje j̄ɛɛnaan? Di wàa hè'in lata gb̄āia bi hea kōn wà kè: Lee wà kea gb̄ān tá ì dèn. Tá ì daji kpasa Eliabu mà Dauda bi ȳaahea gb̄āiazo, ì hūngà'izo ì kè: Budikpaaji n nù guii? Ji n t̄āa mɔkōnia tò'in ì ooũ gumasamaũ? Ma n kalambaani d̄ɔ n t̄ɔlagbadazo. N nù j̄ɛɛ waji. Dauda kè: Bu maa kè? Baa ȳāa

má heaa? Di ì kpɛɛ sɔdì'in ì wèè ì yǎa doo be làla gbānkeema. Lata gbān mahɛɛ hɛ'in, lee wàa hɛ'in mɔɔ. Yǎa be tá Dauda hɛ wà ladì Saulun, di ì ì shìshi.

Tá Dauda nù, ibe hɛ Saulun: Gbānkan ba to zūu kata'in Filishiti be yāajia. Maa n zɔɔkeda, má wada jěɛkeji'izo. Di Saulu kɛ'in: M̐ba zāia ñ wee jěɛkeji Filishiti bezoa. Miia ni bɔtɔnin. Gbace be kīn, jěɛnajan tun ì jingekedii. Di Dauda kɛ'in: Maa n zɔɔkeda, maa di ta ma je tāana dā. In shimɔ ko kpabo nù ì tāa kũ gaaũ, mata dɔ ì gbeema mà wě mà tāa be bo ì leeũ. In ì kpàtɛemazo, di mata kũ ì lokohikakama mà wě mà dɛ. Maa n zɔɔkeda, ma shimɔ dè kpabozo kōn, mɔɔ Filishiti zumbanaje be gōa doo hoā bezo, dun ibi shīnlelagoa Lakii betekenaje jěekenaan. Dauda ladì ì kè: Lata Baanaje ma bò shimɔ leeũ kpabozo, lee ì ma boa Filishiti be ooũ. Di Saulu kɛ'in: Ñ wee! Baanaje bee'nzo.

Saulu ì jěɛkehoā gǎ'in, ì ì mɔɔcɛ fula gǎ'in, di ì ì mɔɔ tɔɔgɔ gǎ'in. Dauda Saulu hɛesaa lòko jěɛketɔɔ bema. Tá ì hwaashì tazo, di iba zāiaa, dun ìta saabukɛzoa. Di ibe hɛ Saulun: Mába zāia mà wee hoā bezoa, dun matà saabukèa. Di ì hoā be bò kōn ibe jè. Ì ì gaa shì, di ì wèè ì gbɛɛ lokociā shì sɔɔ oo gu'ɛɛũ, ibe dà ì hōngɔkebandaũ. Di ibi nua kutu Filishiti be gu, ì ì bindo kũ.

Di Filishiti be bi nua kutu Dauda gu, ì matashikūda bi taa ì ɛɛ. Tá ì Dauda wà, ibe wà ni bɔtɔni cɛ yāazo, di ì ì shambò. Ì kɛ'in: Maa gbēn, di mbi nua ma gu gaazoa? Di ì leekè'in ì jiina tozo. Di ì ladì ì kè: Ñ nu ma gu, maa n gèè kpa bāanama lateɛsɔɔnazo.

Dauda kè'in: Hēesaa shingezo shinge sàazo mbi nuazo ma gu. Maakīn, Baanaje Jē'eekeda Isra'ilaā Lakii tá mbi shīnlelagoa'in ì to mabi nuazo n gu. Baanaje n daamee ma ooũ kpāia. Má n meá, má n mii zēeda, má Filishiti jēekena gèena kpaa bāanama lateesōnazo kpāia, dunia dōa kōn tá Lakii bee Isra'ilaāzo. Gbāia tá hàkō guii dōa tá Baanaje bata jēebēe hēesaazoa ko shinge. Baanaje di jēe gbada zo, ì a daawēe wa ooũ.

Dii tá Filishiti be bi nua kutu Dauda gu, ibi nua ì deteeji, di Dauda baashì ibi shia'ima gu tá wà jēekēa. Di ì oogā ì bandaũ, ì gbēe bō ì dà ì bindoũ. Tá ì zù Filishiti ben, di ì ì hwà ì eema. Gbēe be gā ì ēē beũ, di ì sò ì gbēũ. Bindozo Dauda jēebēe Filishiti bema. Ì ì hwà ì ì mē, ko hēesaa ìta kũa. Di ì baashì ì wēe ì kù ì gu, ì ì hēesaa gò ì keũ, ì ì dē ì ì mii zēezo. Tá Filishitiā wà à nōgōni be gā, à wàzā kōma. Di Isra'ilaā Yahudaāzo dō'ama jīndazo, à à yà ha Gata bika leema Ekeloni kpalezo. Gbāia tá à dēde gèena gō intēna tun Saalimu zeema ha Gatazo Ekelonizo. Tá à shì Filishitiā yagu, di à à gaa hoā nàakō. Dauda Filishiti be mii shì ì wēezo Ulusalima, ì ì jēekehoā dà ì keũ.

Dii tá Dauda bi nua kutu Filishiti be gu, Saulu bi ì waa, di ì ì jēekena kpasa Abinēe lāla ì kē: Jinge be ji nin? Ì jinshì'in ì kē: Kii, n betekezo, matà dōa. Di kii kē: N lala n ma jinge be ji nin. Tá Dauda shì Filishiti be dezo, Abinēe ì shì ì wēe'izo Saulu gu, ì Filishiti be mii kũ. Di Saulu ì lāla ì kē: Ni, miia ji nin? Ì jinshì'in ì kē: Maa n zōkeda Yeshe, Baitalami gbān nin.

Saulu gaabakeã Daudazo

Tá Dauda yãahè Sauluzo ibe yã, di Yonatã ijekè'izo, ì yaa'iji doo ì ginde betekèzo. Tun dii be Saulu ì dà ì bà, ìta shi ì wee ì je bà mɔɔda. Yonatã leedookè'izo, dun ì yaa'iji doo ì ginde betekèzo. Di ì tɔɔɔ gba tá ibe gã ibe bò ì ì gbà ì j̄ɛketɔɔzo ì h̄ɛsaazo ì saazo ì beeh̄izo. Komai tá Saulu Dauda j̄ j̄ɛkeji, ita saa'a ta, di ì ì j̄ɛkenaa kpasa. Ì yã ta ke kojìn yãazo Saulu ɛkenaaazo k̄n.

Tá j̄ɛkenaa bi shia Dauda Filishiti be deã kpɛɛ, nenenia bò Isra'ila hwaanaũ k̄n, à wèe k̄taji à kii Sauluzo, àbi leeshia, àbi bee'oa, àbi bàa dea, àbi zũuhukɛa, àbi cekiwɛa. Àbi leeshia, àbi dɔa k̄n, àbi bee'oa, àbi kea:

Saulu gbãia dède koi sɔɔ (1,000),

Dauda k̄n kasɔɔ wokoi kù wokoi (10,000).

Yãa be Saulu wã hale, di ì hũngà ì kè: Wà kasɔɔ wokoi kù wokoi kpà Daudama, maak̄n koi sɔɔ. Kiiɛɛɛ di ḡ ì shi tandi. Tun dii be ì wiegã'in.

Tá gu dɔ, di Lakii tò Saulu tãa zɛzɛ be shia, ibi yãakashik̄k̄ɔa ì keũ, di Dauda ì doma shì, ibi dea lata ita ke diik̄n. Saulu bee shingezo kũa, di ibe zù ì kè: Má Dauda hwaazo mà ì na kpatama. Di Dauda ɛɛ'n kù hwaa. Saulu ta Dauda wasaama, dun Baanaje bee'izo, mɔɔ ì togokè'izo. Di ì Dauda yà ì ì j̄ɛnaa kasɔɔ wokoi kpasa. Ìa ta di ɛɛ j̄ɛkegu. Komai tá ì wèe ita saa'a ta, dun Baanaje bee'izo. Tá Saulu wà ita saa'a ta, di ì ì wasaamà ì dà

yāala. Isra'ilaā Yahudaāzo kīn à yaa Daudaji kōn, dun ita di ɛɛ jēɛgu.

Di Saulu kè'in: Má ma nene mahebo kpaa'mma ne. Ñ gōmɛɛ nɔgōni, ñ jēekemɛ Baanajen. Dun Saulu bēedà ì kè: Mába oonaa'ima, Filishitiā di ì dea. Di Dauda kè'in: Maa jin? Ma baa gbāia ma je boiinazo jinun sa'ai mà gō n ni zāa? Tá Melabu bòo wà kpa Daudama, di Saulu ì kpà Mēhola gbān Adielima.

Saulu nene Mikali yaa Daudaji. Tá wà yāa be hē Saulun, ì kè'in yāazo ì kè: Má ì kpaa'ima, ì gōa'in kushe, Filishitiā ì dea. Di ibe hē Daudan: Í ma ni kee ta ñ shi tandi. Di ibe hē ì ɛekenaan: À yāahe Daudan ashiiū, à ke'in ì yāa kēmɛɛ, mɔɔ ma ɛekena yaa'iji kōn. Ì ma nene shi. Ì ɛekena yāa be kàa Daudan ì tōlama, di ì kè'è: Gōa kii ni zāa aahan ya? Maa talaka nindenajen. Tá Saulu ɛekena shì, à Dauda yāa be ladì'in. Di Saulu kè: À he'in mába yaa wɛeni hokanjia, sai ì hindebomɛ ma gaajeā Filishitiāma, ì shime à zumbaāzo ni kasɔɔ. Ibi waa Filishitiā ì dea.

Tá ɛekena be yāa be ladì Daudan, gōa kii ni zāa kè'in yāazo tandi. Daaji nenen be shidii boo, Dauda ì jēekenaazo kpàtɛ à wèe à Filishitiā dède gbāia koi doo, di ì shì à zumbaāzo, ibe kpà kiima kōn, dun ì gō ì ni zāa. Di Saulu ì ni Mikali kpà'ima ne. Tá Saulu wà lee, ibe dō Baanaje bee Daudazo, mɔɔ ì ni Mikali yaa'iji, di ì ì wasaa laakè, ì gō ì gaaje ha ì gà. Dii tá Filishitiā kiina bò à wèe jēekeji, Dauda saa'a tà ì dà Saulu dɔda kāala, di ì tobò gbagba.

Saulu Dauda tobekeã

Saulu h      ni Yonat  n    d  naazo k  n    Dauda d  . Amaa Yonat   yaa'iji gbagba, di       gb   kulaladi    k  : Ma je bi n gudea    n d  .    n ginde k   lah   saazo. Dudugu gude   g   bee  . M   boa hwa   kp  e ma jezo, w   g  oda gu t   n d  du. M   n y  a hea'in. Lata ibe h  m  e, m   heamii.

Di Yonat   w  e    Dauda saabukp      jen    k  : Baaba, m  ba hozezeke n z   k  da Daudanda, dun   ta hozeze kee kemiida.    hoke   y  a zomii gbagba. T      Filishiti be d  ,    g      bet  ken, di Baanaje t   wa Isra'ila   b  e j  ezo gba wa kp  e k  n. Nn w  , di n z  uhuk  . Budikpaaji n yaa hozezeke y  ab  anaje ben       d   togo? Saulu    y  am  , di    jiid      k  : Maa sh   Baanajezo w  ba    d  aa.    kp  e Yonat   Dauda sh  shi    y  a be lad  in k  n, di    w  e Daudazo Saulu gu, di ibi j  ikea'in doo y  azo.

J  e lad      kp  t  e, di Dauda w  e j  e  ji Filishiti  zo.    s  o'  ma       b  e j  ezo k  nk  n, di    baash  in.

Baanaje t   Saulu t  a zeze be lad      sh  a dii t      z  t  e    ke  .    bee shingezo k  a, di Dauda bi    doma d  a'in. Saulu gud      Dauda hwa shingezo       na kpatama. T      k  tan, di shinge be kpat   hwa.

G  m   be Dauda baash      w  e. Di Saulu gb  ia j   Dauda b         d  ,       d   saazo, di    n   Mikali    gb   kulaladi    k  : In nt   baashi g  m  zoa, w   n d  a lah   saazo. Di Dauda b   taaga  , Mikali    z  ga b  ezo t  ema, di    baash      g  g  . Di Mikali jii sh   ibe   t  e

intɛɛboma, ì bee shèe shì ibe dà jii be miima, di ì bashe tàta'ila. Tá Saulu gbãia jĩ Dauda kũji, Mikali kè ibi geedɛa. Di Saulu ladì ì gbãia jĩ Dauda waji, ì kè'ɛɛ: À ì shi ì intɛɛbomazo ledolɛ, à nu'izo ma gu mà ì dɛ. Tá à gã keũ, jii be abe tà intɛɛboma, bee shèe bee'ima ì miima. Di Saulu Mikali làla ì kè: Budikpaaji n bò ma kpɛɛ n ma gaaje tò ì hɛmama lee? Mikali jinshì'in ì kè: Ibe hɛmɛɛ mà to ì gãgã. In ma ge, ì ma dɛa.

Tá Dauda baashì ì gãgã, ì wèe Sama'ila waji Lama. Yáa tá Saulu kè'in ibe ladì'in kɔn, di à wèe à zùtɛɛ Nayotu ledolɛ. Tá wàa hɛ Saulun, Dauda bee Nayotu Lama, di Saulu gbãia jĩ ì kũji. Tá à bòo gube, abe wà annabi kungia bi annabijĩikea, Sama'ila bee à gu à ɛkɛda. Di Lakii Tãa dà jĩnia bema, àbi annabijĩikea kɔn. Tá wàa hɛ Saulun, di ì gbãnkãa jĩ, di à annabijĩikè lee mɔɔ. Saulu ladì ì gbãia jĩ kù aabɔabo, di à annabijĩikè lee mɔɔ. Di Saulu kpàtɛɛ ibi wada Lama ì ginde tandi. Tá ì bòo igu'ɛɛ gba tá bee lɛɛ Shɛku sɔ, ì gbãia làla ì kè: Sama'ila Daudazo bee mai? Di wà kè'in: À bee Nayotu Lama. Tá ibi wada gube, di Lakii Tãa dà'ima kɔn, ibi wada, ibi annabijĩikea ha ì bòo Nayotu Lama. Ì ì tuhwaana bò'ila, ì annabijĩikè Sama'ila ɛɛ. Lokaci be usɔɔbii gũmɔzo kɔn ì intɛɛde hĩitogo. Ĩadikpaaji wàta kɛ: Saulu bee annabiã gu kɔn ya?

Dauda Yonatãzo

Dauda bò Nayotu Lama ì baashì ì wèe Yonatã gu, di ì ì làla ì kè: Bu maa kè? Tɔɔ kpashe maa kè? Hozɛɛ kpashe maa kè n jen di

ibi ma gudea ì ma de? Ì jinshì'in ì kè: Jam! M̐ba gaada. N̐ wa, ma je bata hokan ke ì gè kaajim̐e ma t̐lammaa, y̐́a gba ko ì m̐k̐ni. Ma je ì y̐́a dii ii kea ì gè hejime̐a? Baa leenda! Di Dauda h̐ m̐w̐: N je d̐ sh̐sh̐ tá n ma wiewà. Īa y̐́aji ìta to n y̐́a be màa, dun n z̐u ba shiikea. Baanaje betেকেzo n betেকেzo ma gaa kutu gaji. Di Yonat̐ k̐'in: Ho tá nn z̐emama k̐n má keamii. Di Dauda k̐'in: N̐ wa, m̐w̐ de sala bee lah̐. Ì k̐ mà zutee mà hobe kiizo. N̐ to mà wee mà dudu late̐ũ ha lah̐ke igee. In n je ma y̐́alàla, n̐ he'in ma màma n̐ ma gba z̐e mà wee ma je hwaaũ Baitalami, dun ma baa gb̐ia k̐n sanga tá w̐ta ke y̐́ey̐́e àbi kea gube. In ì k̐ ì y̐́azo, mag̐a lah̐a, amaa in ì h̐ngà gbagba, n̐ d̐ ì y̐́az̐̐ ì hoz̐e kem̐e gube. N̐ y̐́a m̐ maa n z̐okedan, dun n i beemazo Baanaje d̐azo. In ma t̐w̐ zo, n̐ ma de n ginde. M̐ba ma kpa n jemaa. Di Yonat̐ k̐: Jam! In maa d̐ tá ma je y̐́az̐̐ ì hoz̐ekemii, mába heamiidaa? Di Dauda ì làla ì k̐: In n je hoz̐e heamii, ji di ì heame̐? Di Yonat̐ k̐'in: N̐ nu w̐ wee late̐ũ. Di à bò à w̐e late̐ũ à gb̐n hwaa.

Di Yonat̐ k̐: Baanaje Isra'ila̐ Lakiizo, daaji lah̐ke leena má ma je gbadikpaa. In n y̐́a k̐'in y̐́azo, má lakpalekemii. In ma je yaaji ì hoz̐ekemii, in mat̐ lakpalekemii ma n zuga n w̐e lah̐aa, Baanaje ho z̐e kem̐e gbagba. Baanaje bee'nzo lata ì bee ma jezo y̐́a. In ma bee betেকেzo, n̐ y̐́a m̐m̐e lata Baanaje ta ke. In ma ga k̐n, n yaa ba y̐ ma baa gb̐iaz̐ kobusaa, ko tá Baanaje t̐ n gaaje̐ y̐ duniaũ. Lee Yonat̐ alkawalik̐ Daudazo,

di ì kè: Baanaje hindebo n gaajeān. Di Yonatā tò Dauda ladì ì jiidà'izo mɔɔ tá ì yaa'iji, dun ì yaa'iji doo ì ginde betekɛzo.

Di Yonatā kè'in: Mɔɔ dɛɛ sala bee lahū. In watà gbānkan wa n kubamaa, wà n yāalalaa. Lahūke n̄ wee duduji gu tá n dùdu yáa be hwaashiādii, ngõ bee gube lɛɛ gbɛɛ sɔ tá bee leekpɛɛ. Má kaa zua lɛɛ gbɛɛ be sɔ wée àa, lata mabi ho hwaa, má jinge kee jīa ì wee kaa be gude. In má he'in, kaana bee ì kpɛɛ, ì shi ì nuzo, n̄ nu, dun Baanajezo ngõa lahia, hadali ba beeda. In má he'in kaana bee ì ɛɛ kīn, n̄ wee, dun Baanaje di n zùga. Yáa tá wa èe kōzo kīn, Baanaje di gõa yáa be sheedanaje diikōn.

Di Dauda wèè ì dùdu lateɛū. Tá mɔɔ dɛɛ bò, kii zùtɛɛ mabenabeeji. Ì zùtɛɛ ì zutɛɛgu lɛɛ kpata sɔ. Yonatā zùtɛɛ ì ɛɛ, mɔɔ Abinɛɛ bee lɛɛ ì sɔ. Dauda zutɛɛgu kīn, gbānkan ba bee gubea. Saulu tà hokan h̄è diibeediida, dun ibi waa hokee di ì tà, ì gbāshik̄è, bee di gè'iji. Tá gu d̄ò mɔɔ dii hwaabōaboū, Dauda zutɛɛgu gbānkan ba beeda mɔɔ, di Saulu ì ni làla ì kè: Budikpaaji Yeshe ni tà n̄ hobejia tun guma? Di ì kè'in: Ì zɛɛ zèemama, ì wèè Baitalami. Ì kè mà to ì wee, dun ì baa gbāia bi sangakɛa hwaa beū, di ì daji kè'in ì nu. Ì kè in ì kèmmɛ, mà ì zuga ì wee ì dajiā waji. Īadikpaaji ìta n̄ mabenabeeji'nzoa. Di Saulu hūngà Yonatāzo ì kè: Ni mɔngɔdaa t̄ōlagbadanaje! Maa d̄ò n bee Yeshe ni kpɛɛn. N ũgā n ginden n d̄ozo. In Yeshe ni be bee betekɛzo duniaū, m̄ba kiikɛaa. N̄ gbāia jī à ì k̄ū à shi'izomɛɛ tandi, dun mà ì dɛ. Di Yonatā ì làla ì kè: Budikpaaji ì gaa? Bu ibe kè? Di Saulu

shinge zù Yonatān dun ì ì dè, di Yonatā dǎ tandi tá ì je yāazēē
Dauda dēāzo.

Yonatā kpàtēē ì mabena tò hūngazo, ìta hobee mɔɔ dii
hwaabōabo dii bea, dun ì zūushikè Dauda yāaji, dun ì je ūkàa
Daudama.

Tá gu dǎ, Yonatā bò ì wèe Dauda taji gu beū. Jinge kee dǎ'ima.
Di ibe hè ni ben. N̄ baashi n̄ wee dabi. Má kaa zua, n̄ gudea. Tá
ni be baashì ibi wada, di Yonatā kaa zù ì miima. Tá ni be bòo gu
beū tá Yonatā kaa zù, di ì leezù ni beji ì kè: Kaa be bee n̄ ēē
dabi. Di Yonatā ladì ì leezù'iji mɔɔ ì kè: N̄ wee hidahida, m̄ba
gōɔda. Di ni be kaa be hākō ì shizo ì baanajen. Ni be tà yāa be
dǎa, sai Yonatā Daudazo. Di Yonatā ì jēēkehoā kpà ni bema ì kè:
N̄ shi n̄ weezo kpēē.

Tá ni be wèe, Dauda kpàtēē tetēē kawa, ì nù ì kùtēē Yonatān kù
àa, ì ìntēē ì gbēēū. Di à leekpà kōma, à ò à gbān hwaa kōn,
Dauda ó di kè gba. Di Yonatā kè'in: N̄ wee lahia, dun wa jiidà
Baanaje tozo wa kè, Baanaje di wa sheedanaje ma boiina n̄
boiinazo zāaū ha diikōn. Dauda bò gube, di Yonatā ladì ì wèe
kpēē.

Sama'ila lalahu hwaabõabo

Dauda Saulu gaã labaii maa

Saulu gaa kpɛɛ Dauda shì Amalekiã basukukeãzo, di ì gǝ Shikilaga dii hwaa. Dii aabõabo nɔgõni kee bò Saulu gaaũ ì nù. Ì tuhwaana kàsoso, mɔɔ kua bee ì miima. Tá ì bòo Dauda gu, ì kùtɛɛ'in ì ìntɛɛ ì gbɛɛũ. Dauda ì làla ì kè: Mai n bò? Ì jinshì'in ì kè: Ma bò Isra'ilaã gaaũ. Di Dauda ì làla mɔɔ: Bu di tà gube? Ì hemɛɛ. Di ì jinshì'in ì kè: Isra'ilaã bò jǝkɛgu à baashì. À gbã dakeã sòo à gàga. Saulu ì ni Yonatãzo gà mɔɔ. Di jinge tá bi labaii be kpaa'in Dauda ì làla ì kè: La di nn dǝ Saulu ì ni Yonatãzo gà? Ì jinshì'in ì kè: Ì kè ma bee Giliboa kasama gube, di ma Saulu wà, ì tungbè ì shingema. Busu gudanaa busunaazo bi nua kutu ì gu. Ì sɔdì ma gu kawa, ì ma wà, di ì ma shìshi. Ma kè: Maa gii! Di ì ma làla, maa jin? Di ma jinshì'in maa Amaleki boiin. Di ibe hèmɛɛ mà nu kutu ì gu, mà ì dɛ, dun ì wada gaaji, ko tá ì wie bee lagoã mɔkɔ. Di ma zǝ'iji ma ì dè, dun maa dǝ iba betekekea mɔɔda. Di ì kii fula tá ibe gǝ maa shì oomahozo tá ibe gǝ, di ma nùzomii guii ma baanaje. Di Dauda ì tuhwaana gàa ibe kàso, di gbãia tá bee'izo à à boã kàsoso kǐn. À Saulu ì ni Yonatãzo gaã ò Baanaje gbã Isra'ilaãzo, dun jǝɛ à bèe. Wɛ'i bò'àma, di à imijǝike ha igɛɛ.

Jinge tá labaii be kpà Daudan, Dauda ì làla ì kè: N baa bee mai? Di ì kè'in: Maa bonu nin, Amaleki boiin. Di Dauda ì làla ì kè:

Budikpaaji kii tá Baanaje kpà ntà ì deã wasaamaa? Di Dauda jinge kee shìshi ì kè: Ì ì wẽ ò ì de kìn. Di ì ì wẽ ì ì dè. Di Dauda kè: N n ginde dè, dun n ginde lée di n dà yãaũ, n kè kii tá Baanaje kpà nn dè.

Tosai lee tá Dauda shì Saulu Yonatāzo gaã yãaji

Dauda tosai lee dii shì Saulu ì ni Yonatāzo gaã yãaji. Ì kè wà lee be dada Yahudaän. Ì bee Gbān Yāana lalahuũ.

Isra'ila daajanaa gàga kasaãma,
nɔgɔni gbadaã sòo fa!
Àba ì labaii kpa Gata zɛenaũ,
dun Filishiti nenenia ba zũuhukɛa.
Àba ì maabake Ashekelonia,
dun zumbanaje nenenia ba zũuhu'o'oa.
Hii ba kaa Giliboa kasama mɔɔda,
laa ba bãa jeenama tá bee gube mɔɔda.
Gube wà gɛɛtɔ nɔgɔnia matashiãma,
yɔɔkekeã Saulu matashima lée bòo!
In wàbi nɔgɔnia ãma hɛa guma,
wàbi à gbɛɛ hwaada,
kaazuda zɛanaje Yonatā bata sɔdia,
hɛɛsaa zɛanaje Saulu bata shi togoa.
Saulu Yonatāzo,
koji yaa'àji, koji à gbagbakè.

Àbata kata kōji betekeũ ko gaũ.
À hida ì dà shengela,
à gbada ì dà shimola.
Isra'ila nenenia,
à we'ikaa Saulu gaã yãaji.
Ì a dà bashe cẽ gãama yãamaboãzo,
ì saabo a tuhwaa yãana gã jinali adohoãzo.
Nɔgɔɔnia sòo jẽekɛgu fa!
Wà Yonatã dè hẽesaazo kasaãma.
Ma gbãn Yonatã,
ma gɔ̃ zũushiũ n yãaji,
n yãazomɛɛ wasawasa.
N yaamaji yàazo gbagba,
ì dà nuhe yàala.
Nɔgɔɔnia sòo fa!
À jẽekɛhoã basukukè.

Dauda kpaã Yahudaã kiikeũ

Bee kpɛɛ Dauda Baanaje zèè ì kè: Mà wee mà zutɛɛ Yahuda hwaa keeũa? Baanaje kè'in ì wee, di Dauda ladì ì ì làla ì kè: Mai mà wada? Baanaje jinshi'in ì kè: Hɛbɛlɔni. Di Dauda wèè gube ì nɛ hwaanazo, Jɛzɛlɛɛli gbãn Ahinɔamu Nabali nɛsɔkɔ Abigaili, Kaamɛli gbacezo. Dauda wèè gbãiazo tá bee'izo mɔɔ, koji ì baa gbãiazo, di à zùtɛɛ Hɛbɛlɔni ì hwaa mɔkɔɔniazo. Di Yahuda

gbānkpasaã nù à yǒw kàa Dauda miima gube, à ì kpà Yahudaã kii.

Tá Dauda mà Yabeshi Gileada gbāia di Saulu dà gu'eeũ, ì gbāia jǐ'ama, à kè'èe: Baanaje abaakakaa'èe! A hoyãa kè Saulu a baanajen, ì ì dà gu'eeũ. Baanaje yàa mǎ'èe amincizo, dun a yǎa be kè. À zūugbadake à gǔw gbada. A baanaje Saulu gà, di Yahudaã ma kpà à kii.

Nee ni Abinee, Saulu jǐekenaa eekeda wèe Saulu ni Ishiboshezo Mahanaimu. Di ì ì kpà kii Gileada teeũ Ashilu boiina teezo Yezeeelizo Efelaimu boiina teezo Biliaminu boiina teezo Isra'ila tee kãazo kǒn. Saulu ni Ishiboshe yēe kahwaabōaboũ ì gǔ Isra'ilaã kii. À kiikè yēe hwaa. Yahudaã kǐn, Dauda à gǔw'izo. Dauda di Yahudaã kii Hebeloni ha yēe sǒhia mǎw sǒbodoozo.

Isra'ilaã jǐekeã Yahudaãzo

Nee ni Abinee Saulu ni Ishiboshe à jǐekenaa bò Mahanaimu à wèe Gibeõ. Zeluya ni Yoabu Dauda jǐekenaazo kpàtee à wèe kǔtaji'àzo Gibeõ lee igũ sɔ. À kee dooni bee i kawa dii, à kee dooni bee i kawa dabia. Di Abinee kè Yoabun: N̄ to jingeã kpàtee à kǔkekewēe. Di Yoabu kè: À ke. Di Biliaminu jǐekenaa kpàtee gbān wokoi wohwaazo Ishiboshe bon, di Dauda jǐekenaa kpàtee gbān wokoi wohwaazo kǐn. Koji oodà ì dēeboda miikpēēji, di à kǔ zēezēe kǔ awazaãma hēezo, à sòo ledole. Di wà tokpà gu ben

Hēeleezojee. Jēe tá wàa kè lokaci be hida gbagba, di Dauda jēekenaa bèe Abinεema Isra'ilaāzo.

Zeluya nɔgōni àa bee gube, Yoabu Abisaizo Asaelizo. Asaeli kīn, ì baashi hidahida doo zṓzo. Di ì hombà Abinεji, ìta sɔdi ookpite kawa ko oozege kawaa. Tá Abinε ì kpεε wà, ì ì wà, di ì kè: Asaeli, miia di gubea? Ì jinshì'in ì kè: Maanε. Di Abinε kè'in: N ladi ookpite kawa ko zεge kawa, n jinge kee kũ n ì hoā shi'ima. Amaa Asaeli tà gṓ'inda. Abinε ladi ibe hē'in mɔɔ ì kè: M̃ba nu kutu ma gua. N yaaji mà n dea? In má n de, má yadakea wa wie kashikō n daji Yoabuzo mɔɔa? Amaa Asaeli gè, ìta gṓ'inda, di Abinε ì ì zṓ ì gbεū ì shinge bazo ha ì bò kpεε. Gube ì sòo ì gà, ìta gò ì gua. Tá koji bòo gu beū tá ì sòo ì gà, à gṓ àbi waa.

Di Yoabu Abisaizo hombà Abinεji ha usṓ sòo. À bòo Ama kasa gu tá àbi kō waa Giazò lεε Gibeṓ gumasama zεε sɔ. Biliaminu boiina hàkō Abinεji kee doo, di à wèe àbi gṓɔda à gindezo kasa miima. Di Abinε leezù Yoabuji ì kè: Ntà dṓ hēesaa gbāia dεdεa kobusaa? Ntà dṓ yāa be yāa zūushizooa? M̃ba hea n gbāian à wa toa à ladi à weedaa? Di Yoabu jinshì'in ì kè: Lakii bee! In ntà yāahè yāada, ma gbāia ba a toa ha gu dā. Tá Yoabu bēε bū, di ì gbāia ùsā, àta wee Isra'ilaāma jēεzo mɔɔda.

Gūmɔ bee Abinε ì gbāiazo tà lateū, à sàda Yuudāma, di à dṓ oo gallama ha à bòo Mahanaimu. Tá Yoabu shì Abinε yagu, di ì ì jēekenaa hàkō kōn. Dauda gbāia bii gbān kadoo woshiizo di ba beeda, Asaeli kpεε. Biliaminu tá bee Abinεεzo à à dēde gbān

kasɔɔ àa nizo ka'aa (). À Asaeli gèe shì abe dà gu'εεũ ì je kasalaũ Baitalami. Di Yoabu ì gbãiazo tà gũmɔzo, gudɔzo à bòo Hebelɔni.

J̄εε tá Saulu baa gbãia kè Dauda baa gbãiazo diihwaakè. Dauda gbada bi shiaa, Saulu baa gbãia k̄in, à gbada bi laboa.

Dauda ninɔgɔnia

Ninɔgɔnia tá Dauda ẽ Hebelɔni toãn di: Ni mahεεbo to Aminɔ, ì d̄ɔ to Ahinɔamu, Jezεεeli gbãn. Ni hwaabɔabo to Kilabu, ì d̄ɔ to Abigaili, Nabali nesɔkɔ, Kaameli gbãn. Ni aabɔabo to Abisaloũ, ì d̄ɔ to Maaka, Gesuu kii Talemai ni. Ni shiibɔabo to Adonia, ì d̄ɔ to Agita. Ni sɔɔbɔabo to Shefatia, ì d̄ɔ to Abitali. Ni sɔbodoobɔabo to Itilamu, ì d̄ɔ to Egela. Dauda nea nia be ẽ Hebelɔni.

Abineε kashikɔa Daudazo

Dii tá Saulu baa gbãia bi j̄εεkea Dauda baa gbãiazo, Abineε bi gbadakũa Saulu baa gbãiaũ. Saulu neneni kee zo ȳaa, ì to Lijipa, Aya ni. Ishiboshe hè Abineεn: Budikpaaji n ìntεε ma je nezo? Abineε hũngà gbagba Ishiboshe ȳaa be ȳaaji ì kè: Maa Yahudaã gbẽ miin ya? Mabi ȳaa mɔa n je Saulu baa gbãian ì dakoãzo ì ijeãzo ha kp̄aia. Matà n nà Daudazo ì ooũa, di mbi ma tɔɔ waa neneni be ȳaaji tandia? Ȳaa tá Baanaje jiidà Daudan in matà

kè'inda, Lakii ho zezε kemεε gbagba. ãa Saulu baa gbãia, má kiike shia'ama, má toa Dauda gō Isra'ilaã Yahudaãzo kii tun Dã ha Bεeshεba. Ishiboshε tã yadakè ì jinshì Abinεen mɔɔda, dun ibi ì wasaamaa.

Abinεε gbãia jì Dauda gu ì tozo ì kè'in: Ji di tεε zo? Wà kōyãashi, má oodaa'mma, dun Isra'ilaã kashikō'nzo kōn. Di Dauda kè: Ì yãazo, má kōyãashia'nzo, amaa yãa doo mabi n zεeda. In mbi nua ma waji, in ntà nùmεε Saulu nεnε Mikalizoa, mba to wa wie kashikōa. Dauda lakpalékè Saulu ni Ishiboshen ì kè: N̄ ma nε Mikali ladimεε. Ma zãakεkawee kpà Filishitiã zumbaãzo ni kasɔɔ. Di Ishiboshε gbãia jì, à nenenì be shì ì zãa Palatiε, Laishi nima. Di ì zãa be bi wada'izo, ì dō'ima ha Bahuliũ, ibi oa. Di Abinεε kè'in ì ladi ì wee, di ì wèe.

Abinεε yãahè Isra'ila gbāngbagbaanazo ì kè: Tun yãa àbi gudεa Dauda gō bee a kii. À ì kpa tandi, dun Baanaje alkawalikè'in ì kè ì ì gbān Isra'ilaã boa Filishitiãzo à gaajeãzo ooũ kōn ì zɔkεda Dauda saabo. Abinεε yãa be kàa Biliaminu boiinan à tōlama mɔɔ. Di ì wèe Hεbelɔni yãa be heji Daudan tá kè Biliaminu boiinan yãazo Isra'ilaãzo. Tá ì bòo Dauda gu Hεbelɔni gbãiazo gbān kadoo tá bee'izo, di Dauda mabena gba kè'èε. Di Abinεε kè Daudan: Ma baanaje kii, n̄ to mà kpatεε mà wee Isra'ilaã hakōmii kōn, à kōyãashi'nzo, dun ngō bee tεε be kii tá n dangakè kōn. Di Dauda Abinεε tò, ibi wada lahia.

Yoabu Abineɛ deã

Lokaci be Yoabu Dauda gbãiazo shì jẽezo. À hoã shì gbãياما gbagba à shìzo. Abineɛ ba bee Daudazo gube mɔɔda, dun ì ì tò, ibi wada lahia. Tá Yoabu jẽenaa tá bee'izo bòo, wàa kè'in Nee ni Abineɛ nù kii waji, di ì ì tò ì wèe lahia. Di Yoabu wèe kii gu ì kè: Bu yãa nn kè lee? Tá Abineɛ nù n gu, budikpaaji nn tò ì wèe? Ntà Nee ni Abineɛ dõa? Ì nù sesekejimii, dun ì n gu weedii dõ n shidiizo n hokeãzo kɔn. Tá Yoabu bò Dauda gu, di ì gbãia jì à hombà Abineɛji. À ì tà Shila igu'ee gu, di àbi shia'izo, amaa Dauda tà dõa. Tá wà bòo Abineɛzo Hebelɔni hwaa leema, di Yoabu ì shishi lata ì yaaji ì yãa duduã he'izo, di ì ì zõ ì gbẽũ ì ì dè. Ì dako deã hinde ibe bò'ima.

Bee kpɛɛ tá Dauda mà, ì kè: Maakĩn ma kiikezo, mába tɔɔ zo Baanajen Nee ni Abineɛ deã yãajia. Ho be wiida Yoabu miima ì je baa gbãiazo kɔn. Yoabu baa gbãia bagõ bee ba ãiahunaje ko kutuunaje ko hõmɔnekũa ko gbãn tá jẽe ì bèe ko nɔɔmada. Yoabu Abisaizo à di Abineɛ dè, dun ãa di à dako Asaeli dè jẽekɛgu Gibeõ yãaji. Di Dauda hè Yoabun gbãiazo tá bee'izo kɔn: À a tuhwaana gaa à kaso, à zagaana gã, à dɔ Abineɛ geema o'ozo. Kii Dauda bi dɔa. Di wà ì dà gu'ẽũ Hebelɔni. Kii ò, ì ga jĩnda'ò Abineɛ kasala gu, di koji ò kɔn. Di kii tosai lee dii shì Abineɛ yãaji ì kè:

Abineɛ gaã doo miibãanajezo ì yãazon bea?

Wàta ì oo èeda kpɛɛzo, wàta mɔɔ hwàta ì gẽenamaa,
di ì gà doo gbãnzò tá gã hozezekenaa ooũ.

Di koji ladì ì ò мов. Koji nù abe hè Daudan ì hobee daaji gu shì, amaa ì jiidà ì gindezo ì kè: In má ihoka ko mabena kee kaa ma leeũ daaji usõ sò, Lakii ho zezε kemεε gbagba. Koji wiehwà yáa bema, di ì kè'èε yāazo. Yáa tá kii be bi kea kōn tà ke gbāian yāazo. Lokaci be Dauda gbāia Isra'ilaāzo kōn dǝ tandi tá kii lee ba bee Nεε ni Abinεε deã yāaũa. Di ibe hè ì gbāia ben: Atà dǝ tá Isra'ila εekeda gba gà kpāiaa? Maakīn, ko Lakii ma kpà kii, ma làbo kpāia. Zeluya nia be hokea zezε ì dà ma bola. Baanaje di hindeboa hozεzekεnaan.

Ishiboshe gaã

Tá Saulu ni Ishiboshe mà Abinεε gà Hεbeloni, ì jiikaka gà, мов wasaa Isra'ilaã kǝ kōn. Saulu ni be jεεnaje εekεnaa zo gbān hwaa, ì dooni to Baana, ì dooni kīn Lekabu. Anun Beeloti gbān Limɔ, Biliaminu boii nia. Wà Beeloti dà Biliaminu tεεũ yāa, dun Beeloti gbāia baashì à wèε Gitaimu, à bee gube ha kpāia. Saulu ni Yonatā kīn ì ni zo hōmonekūa. Dii tá ni be yēε kè sɔɔ, di Saulu Yonatāzo gaã Jezεεeli labaii shì. Tá ì katada ì shì, ibi baashia'izo, ì hidakeāu di ni be bò'ima ì sò. Īadikpaaji hōmone ì kǝ. Ì to Mεfiboshe.

Beeloti gbān Limɔ nia be Lekabu Baanazo à kpàtεε, usõ hida bii à bòo Ishiboshe bà, dii tá ibi usõ bii ii'oa. Di Lekabu ì dako Baanazo à gǝ keũ, abe kè lata àbi wada alkama kashiji. Tá à gǝ keũ, Ishiboshe ìntεε ì intεeboma, di à gǝ'iji ke'iiboũ, à ì zǝ à ì dè. Di à ì mii zǝ abe shì à wèezo. À gǝ Yuudā lateεũ, di à tàũ ha gu

dò. À nù Dauda gu Hebelɔni Ishiboshe miizo à kè'in: Nè wa, n gaaje Saulu tá gudè ì n de, ì ni Ishiboshe mii gii. Wa baanaje kii, Baanaje hindebòmii Sauluma ì boiinazo kpãia. Dauda jinshì'èè ì kè: Baanaje bee! Ì ma bò ma nindekeãu kɔn. Tá gbânkee nù ma gu Shikilaga yãa ì kè Saulu gà, ibi waa labaii yãa ibi kpaa, di ma ì kù ma ì dè. Idia ì labaii laadan. Hade lata ãa gbace zezẽa a tɔɔbaanaje dè ì intɛeboma ì keũ, má ì deã hindeboa'azo mà a boa duniaũ. Di Dauda yãahè ì jingeãn, di à à dède. À à ootâtãa à gẽetâtãazo zẽezẽe, di à à gèena lòko lɛe Hebelɔni igũ sɔ. Di à Ishiboshe mii shì abe dà gu'eeũ Abinɛe gbɛekooũ Hebelɔni.

Dauda kpaã Isra'ilaã kiikeũ

Isra'ilaã boina nù kɔn Dauda gu Hebelɔni à kè: Wa ãma doo. Tun yãa dii tá Saulu bee wa kii, miia di nta di wa ɛɛ jẽekegu weena shiãzo. Di Baanaje hèmii miia di ngɔa bee ì gbãn Isra'ilaã ɛekeda, à kii. Tá Isra'ila gbânkpasaã nù kii Dauda gu Hebelɔni kɔn, gube ì leedookè'azo Baanaje ɛɛ, di à yɔ́o kàa ì miima, à ì kpà Isra'ilaã kiikeũ. Dauda yẽe kadoowokoibɔabo ì gɔ́ kii, ì kiikè yẽe kahwaa. Ì kè Yahudaã kii Hebelɔni yẽe sohia mɔɔzo sobodoo, di ì kè Yahudaã Isra'ilaãzo kɔn kii Ulusalima yẽe kadoo wokoi wo'aazo.

Kii ì gbãiazo wèe Ulusalima jẽekeji Yebushiãzo tá bee gube. Di à kè Daudan: Mba gãa guiida, ko bĩaa guuguãzo à n yaa. Àbi waa Dauda ba zãia ì gã gubea. Amaa Dauda hwaa bikanaje tá wàta

ke mɔɔ Shiona be shì, di ì gǝ ì hwaa. Dii bee Dauda kè: In gbǎn yaaji ì Yebushiã dede, sai ì gǝ izɛɛũ tá wàa kɔsɔkè gbɛɛũ, ì booda guuguã gu bĩaazo. Dauda gaajeãn. Ĩa yǎaji wàta ke bĩaa guuguãzo ba gǝa kii baa. Di Dauda gaa kpǎkpǎ hwaa bikanaje beũ, ì ì ginde tokpàn Dauda Hwaa. Ĩ keã bòbo ibe lòkoci tun gu tá wà gu'ɛɛ gba hwàhwa wàta ke Milo ha hwaa gudoodooobii. Dauda gbada bi shiaa, dun Baanaje Lakii Jǝɛ'ɛkɛda bee'izo.

Taya kii Hilaũ gbǎia jĩ Dauda gu lambe agoãzo kɔsɔkenaazo gbɛɛzɛɛnaazo, di à ke bò'in. Di Dauda dǝ tandi tá Baanaje ì kpà Isra'ilaã kii, mɔɔ ì ì kiike laakè'in, dun Isra'ilaã bee Baanaje gbǎia.

Tá Dauda bò Hebelɔni, ì ladì ì ne kǎa shì Ulusalima mɔɔ neneni kǎazo, di ì nɔgɔɔnia nɛɛazo ɛ'azo. Ninɔgɔɔnia tá ì à ɛ Ulusalima toãn di: Shemua, Sobabu, Natã, Sulemanu, Ibaa, Elisua, Nɛfegi, Yafia, Elisama, Eliada, Elifeletizo.

Tá Filishitiã mà wà Dauda kpà Isra'ilaã kii, di à wèe àbi ì betɛke gudea kɔn. Tá ì à labaii mà, di ì wèe lateɛkokoũ. Filishitiã jǝɛ'oolagò Lefai gu'intɛɛnaũ, di Dauda Baanaje zɛɛ ì kè: Mà wee detɛɛji Filishitiãma, í à daamɛ ma ooũ? Di Baanaje jinshì'in ì kè: Ñ wee, má à naamii n ooũ. Di Dauda wèe Baali Pelajimu, ì à bèe jǝɛzo gube. Di ì kè: Baanaje dìmɛɛ ɛɛ, ì bò bùi ma gaajeãma, lata í ta gu'ɛɛ zɛɛ bùi. Di ì tokpà gu ben Baali Pelajimu. Filishitiã à jiina tò gube, di Dauda ì gbǎiazo abe hàkɔ à wèezo.

Filishitiã ladì à nù mɔɔ à jǝɛ'oolagò Lefai gu'intɛɛnaũ. Di Dauda ladì ì Baanaje zɛɛ mɔɔ. Di Baanaje jinshì'in ì kè: Mba wee'àma

susuuda. Ñ lokoci à kpɛ kawa, ñ soo'àma wubutu gushi gu. In a ta bĩbĩ mà agoã be miima, à ke hidahida, dun maa di bò ma di a ɛɛ gube, dun mà j̣ɛɛbee'ɛɛ Filishiti j̣ɛɛnaama. Dauda kè lee lata Baanaje hèn'in, di ì j̣ɛɛbèè Filishitiāma tun Gibeō ha weeji Gezɛɛ.

Shia Baanaje akpatizo Ulusalima

Isra'ilaã tá Dauda à bòbii ì à hàkō gbāia kasō wokoi kù kadoo wokoi. Di ì kpàtɛ ì dà'àzo zɛɛma, à wèè Baala tá bee Yahuda tɛɛũ, dun à Lakii akpati shi à shizo. Baanaje J̣ɛɛ'ɛɛkeda bee akpati bela mala'ika gambanaa zāāũ, di wàta ke ì to beema. À adaka be dà dìi guda dɛɛũ Abinadabu bà kasama, di à dàzo zɛɛma. Abinadabu nia Uza Ahiozo di bi wada dìi guda bezo, Lakii akpati beeũ. Ahio di di ɛɛ, di Dauda Isra'ilaãzo àbi bee'oa kōn Baanaje ɛɛ à gbada leekpɛ leeshiāzo. Wàbi doma dɛa, wàbi fii dɛa, wàbi bāa dɛa, wàbi tō dɛa, wàbi ceki wēa.

Tá à bòò Nakō wiewēgu, diina gēeshì, di Uza oobò ì nà Lakii akpati bema. Di Baanaje hūngà'izo, ì ì wē ì ì dè lɛɛ akpati sō gube tō be tá ibe kè yāaji. Dauda hūngà dun Baanaje hūngà Uzazo, di wàta ke gu ben Hūnga Uzazo ha kpāia. Dii be Dauda Baanaje wasaamà ì kè: Bu má kea mà Baanaje akpati shi ma weezo? Di ìta yadakè ì shìzo ì hwaaũ mōda, ì sōdì ì wèezo Gata gbān Obɛdɛdōmu bà.

Baanaje akpati bee ì bà ha mō àa, di Baanaje abaakakàa'in ì baa gbāiazo kōn. Wàa hè kii Daudan wà kè: Baanaje abaakakàa

Obededomu baa gbāian hoāzo tá ibi zo kōn ì akpati yāaji. Di Dauda wèe gube, ì Lakii akpati shì ibi shiazo ì hwaaũ zūuhuzo. Gbāia tá Baanaje akpati shì tá à gēējè kù sɔbodoo, di Dauda sangakè diisaazo dii bɔtɔni jiikeāzo. Dauda tungba sanga tɔɔ gā, ibi bee'oa Baanaje ɛɛ ì gbada leekpɛɛ. Īa Isra'ilaāzo kōn àbi shia Baanaje akpatizo, àbi zūuhu'o'oa, àbi bēē būa. Tá Baanaje akpati bi gāa Dauda hwaaũ, di Saulu ni Mikali bi tɛɛ waa taagaũ. Tá ibe wà kii Dauda bi heeheeda, ibi bee'oa Baanaje ɛɛ, ì ì shambò ì zūuũ. Tá wà shì Baanaje akpatizo, wàa dà ì gu bashekeũ tá Dauda bò. Di sanga tá wàta kaa ce bii ì wā ibe hè Baanaje ɛɛ saabukpasangazo. Tá ì sangakè ibe yā, ì sangayāakè gbāian Baanaje Jēekenaanaje tozo. Di ì ihoka gbìigbii Isra'ilaān tá hàkō gube doodoo nɔgōniazo neneniazo kōn dabinu kpanjicēzo doodoo sō kutuzo doodoo.

Tá Dauda bi wada sangayāakeji ì baa gbāian, di Saulu ni Mikali bò ì wèe kōta'izo ì kè: Nn Isra'ilaā kii, n kè gbān gbitee kpāiaa? N n ginde jii mò n ɛɛkenaa nuhe zɔɔkenaan, doo ũbāanajezo ta ì ginde jii mò'ɛɛ. Di Dauda kè Mikalin: Baanaje ma bee'ò'in. Baanaje di ma bòbii n je ì baa gbāiazo gēɛ, ì ma kpà ì gbān Isra'ilaā ɛɛkeda. Má gbitee lagoa ì dà beela, má ma ginde laboa n wieũ, amaa nuhe zɔɔkenaa be tá n à yāa hè anun di ma daajakɛa. Di Saulu ni Mikali tà ni'ɛa ha ì gà.

Lakii alkawalikeã Daudan

Tá kii zùtɛɛ ì bà, Baanaje ì bò gaajeã ooũ tá lòkoci'ima, ì ì gbà usãgu, di kii hɛ annabi Natãn: Ee! Ke tá wáa bò lambe agozo di ma beeũ, Lakii akpati kɪn ì bee bashekeũa? Natã jinsh'in ì kɛ: Lata ì bee n zũuũ kɪn ì kɛ, dun Baanaje bee'nzo. Gũmɔ bee Baanaje yãahɛ Natãn ì kɛ: Ñ wee ñ he ma zɔkɛda Daudan ma kɛ, ke tá magɔa beeũ ba ãa di boameɛda. Tun dii tá ma Isra'ilaã bò Masa ha kpãia matà baa boa. Mata tata gugu, basheke di ma beeũ. Gu tá ma tàta ma gbãn Isra'ilaãzo kɪn mata ɛɛkenaa da à di'ɛɛ ɛɛ, amaa matà he à gbãnkann, budikpaaji atà ke bomɛ lambe agozoaa? Ñ wee ñ he ma zɔkɛda Daudan, ma Baanaje Jɛɛkenaanaje ma kɛ, ma ì shì tãadãgu, dun igɔ bee ma gbãn Isra'ilaã ɛɛkɛda. Ma bee'izo gu tá ì wɛɛ kɪn, di ma ì gaajeã dɛdɛ'in. Má toa ì tobo gbagba tandi, igɔa bee dunia tonaa bii. Má tɛɛ kpaa ma gbãn Isra'ilaãma, má à daaũ, à zutɛɛdaũ à bon. Àba zũulugbeke mɔɔda. Gbace zɛzɛã ba à wicɛkɛa lata à à wicɛkɛ mahɛɛzo dii tá ma ɛɛkenaa dà'ɛɛ mɔɔda. Má ì boa ì gaajeã be ooũ kɪn.

Ma Baanaje mabi hea'in, maa di baa boa'in ì boiinazo. In ì dii hwà, ì gà, ì boiina tá bò ì hĩũ kee má ì lakpatɛɛda, má ì kpaa kiikeũ. Ìa di ì baa boa, ma to gɔa beema, má toa igɔ bee kiikeũ ha kobusa. ⁴ Maa di gɔa bee ì je, ãakɪn gɔa bee ma ni. In ì tɔɔkɛ, má nindekpaal'ima gaazo, lata je ta ì ni tu. Amaa má yàa ba goa'ima lata maa gò Sauluma tá maa bò kiikeũ Dauda ɛɛ. Ì boiina kiikea kobusa. Ì kiike be gɔa jeã.

Di Natā yāa be ladi Daudan lata Baanaje hē'in kōn.

Dauda Baanaje zēena

Di kii Dauda gā ì zùtē Baanaje ē ì kē: Baanaje Lakii, maa bun? Ma baa gbāia jinun di n ma dà kpasake dii iima? Baanaje Lakii, bee kēmii mākō ha tandi, di maa n zōkeda boiina tá gōa bee lahū n yāahē mōa? Lee mbi keamē yà, Baanaje Lakii? Baanaje Lakii, bu di má heamii mō? Maa n zōkeda n ma dō. N ho gba be kē lata n yaaji yāa tá nn jē yāaji, di nn tò maa n zōkeda maa dō. Baanaje Lakii, n gba fa! Gbānkan ba gbadikpa'nzoa. Sai miia baanaje kee ba beeda, lata wāa mà tōlazo. Ji di gbadikpaā n gbān Isra'ilaāzo? Dunia boiinan boii doo be n à bō zōkēāu n gbāia. N n ginde to bō, n yāa gba kē n mamaakiā kē n gbāia ben, n boii kāa à jiinazo yà n gbāian tá n à bō Masa. N Isra'ilaā dà àgō bee n gbāia ha kobusa. Baanaje, n gō à Lakii. Baanaje Lakii, yāa tá nn jē maa n zōkedan ma bàzo, n jīikema kobusa. N ke lata nn hē, n tobo gbagba ha kobusa. Gbāia kea Baanaje Jēē'ēekeda Isra'ilaā Lakiin, mō maa n zōkeda Dauda, n ma bà kaashekihea, dun Baanaje Jēē'ēekeda Isra'ilaā Lakii, nn hēmē n kē n ma bà boamē ma boiinazo. Īadikpaaji maa n zōkeda ma zūugbadakē, ma zēena dii kē'mma. Baanaje Lakii, miia di Lakii, n yāa aminci zo, di n yāa yāazo be hē maa n zōkedan. N abaakakaa maa n zōkeda ban tandi, n wiedo ma kobusa. Baanaje Lakii, n yāahē, n abaakakāa maa n zōkeda ban, ì abaaka taa ha kobusa.

Dauda jěɛbeena boii kãama

Bee kpɛɛ Dauda jěɛbèè Filishitiãma ì à làbo ì à hwaa Gata shì'ama. Ì jěɛbèè Mɔabuãma, di ibe tò à ìntɛɛ lɛɛ kɔ̃ sɔ tɛɛma, ì bɛɛ gbadikpà'ama. In ì bɛɛ hwaa zãaũ dèdɛ, ita bɛɛ doo zãaũ to betekezɔ. Di Mɔabuã gɔ̃ Dauda zɔɔkenaa, di àta tɛɛ'ia kpa'in. Dauda jěɛbèè Leobe ni Adadezɛɛ, Zoba kiima, dii tá kii be ladì ibi wada jěɛkeji Gbãia tá bee kutu Yufulata ooma. Di ì ì busu gudaã kũkũ koi sɔɔ busu gudanaazo gbãn dubu ka'aa sɔhia gɛɛ jěɛnaa gbãn dubu kadoo. Di ì à busuã gɛɛkĩi zěɛzěɛ kɔ̃n, busu kasɔɔ di bò. Suliaã tá bee Damasaku nù oodaji Adadezɛɛma, di Dauda à gbãia dèdɛ dubu kadoo wohwaazo. Ì gudãnaa jèje Sulia tɛɛũ, di à gɔ̃ ì zɔɔkenaa, àta tɛɛ'ia kpa'in. Baanaje tò Dauda jěɛbèè gu tá ì wèè kɔ̃n. Dauda Adadezɛɛ ɛɛkenaa jinali oomahoã hàkɔ̃ ì wèèzo Ulusalima. Ì mɔɔcɛ hàkɔ̃ dake Adadezɛɛ hwaanaũ tá wàta kɛ Teba Belotaizo.

Tá Hamata kii Tou mà Dauda jěɛbèè Adadezɛɛ jěɛnaama kɔ̃n, di ì ì ni Hadolamu jì hookpajì'ima. Ì ì saabukpà jěɛ tá ibe bèè Adadezɛɛma yãaji, dun Tou jěɛkè'izo yãa. Hadolamu nù jinali hoãzo azuhwa hoãzo mɔɔcɛ hoãzo, di kii Dauda jè Baanaje bon, lata ibe kè azuhwa jinalizo tá ibe shì boiinama tá ì gbadabèè'ama kɔ̃n, ɛdɔũa Mɔabuãzo Amɔniazo Filishitiãzo Amalekiãzo. Lee ibe kè hozo tá ibe nàakɔ̃ Zoba kii Adadezɛɛ, Leobe nima. Leen Dauda tobò. Tá ì jěɛbèè Suliaãma ì shì, ì ɛdɔmua dèdɛ Gu'intɛɛna Wushinajeũ dubu wokoì wɔsɔɔ wo'aazo.

Di ì gudānaa jèje Edōmu tēē mōw, di Edōmua be gō ì zōkēnaa. Gu tá Dauda wèe kōn Baanaje tò ì jēēbèe.

Dauda di Isra'ila boii kōn kii, ì yāa yāa kè ì gbāian ì zeema. Zeluya ni Yoabun ì jēēkenaa ēkēda. Ahiludi ni Yehosafatan ì maabakēda. Aitubu ni Zadoki Abiata ni Aimelekizo anun sangakiina. Shelayan ì lalahukēda. Yehoyada ni Benayan ì dogaliā gbān gbagba. Dauda ginde nōgōnia ì ēkenaan.

Dauda yāa mōa Mefiboshen

Dauda gbāia lāla ì kè: Saulu boii kee tà gōaa? Ma yaaji mà yāa mō'in Yonatā yāaji. Saulu bà jīkēda kee bee, ì to Jiba, di wà ì shìshi kii Dauda gu. Ì ì lāla ì kè: Nn di Jibaa? Ì jinshì'in ì kè: Ee, maa n zōkēdan. Di kii be ì lāla ì kè: Saulu boii kee bēteke zo ha tandia? Ma yaaji mà Lakii yāa mō'in. Di Jiba jinshì'in ì kè: Yonatā ni kee bee ha tandi. Guugun. Di kii ì lāla ì kè: Ì bee mai? Jiba jinshì'in ì kè: Ì bee Amieli ni Makii bà Lodebaa. Kii Dauda gbāia jī, di wà nù'izo. Tá Yonatā ni Mefiboshe, Saulu cīini bòo Dauda gu, ì kùtēē'in ì intē ì gbēema. Di Dauda kè: Mefiboshe! Ì jinshì'in ì kè: Maa n zōkēdan. Di Dauda kè'in: M̃ba wasaamaa, dun má yāa mōamii n je Yonatā yāaji. Má n cīi Saulu jeena ladiamii kōn, í nua hobeejimazo diikōn. Mefiboshe kùtēē'in ì kè: Maa n zōkēda jin tá n ma wiewà? Ma bee doo gbē gēezo.

Di kii Saulu zōkēda Jiba shìshi, ì kè'in: Ho tá bee Saulu bon ì baa gbāia bozo kōn, maa kpà n baanaje cīinima. Mīia n niazō n zōkēnaazo, à ì jee jīike'in, à ì hoā kpākpā, dun n baanaje cīini

be humabee ta. N baanaje cīini Mefiboshe hobeedamazo diikōn. Jiba kīn ò nɔgōnia zo wokoi wɔwɔzo zɔkɛnaazo gbān kadoo. Di Jiba hē kii ben: Yāa tá ma baanaje kii hē maa n zɔkɛdan, má kɛa kōn. Di Mefiboshe ta hobe kiizo, ò gō doo kiinia doozo. Mefiboshe ninɔgōni zo, ò to Mika, mɔw Jiba baa gbāia di ò zɔkɛnaan kōn. Ì bee Ulusalima, dun ita hobe kiizo diikōn. Īa guugun.

Dauda jēbeena Amōniamā

Bee kpɛ Amōnia kii gā, di ò ni Anuni gō ò gē. Dauda kē: Má indakɛa Naasa ni Anunin lata ò je indakēmɛ yāa. Di Dauda ò ɛkɛda kāa jī ò gu, dun à wee Amōni tɛū à ò jii'ē'ē'in ò je gā yāaji. Tá Dauda ɛkɛnaa be bōo gube, Amōnia kiina hē à baanaje Anunin: Mbi bēdaa Dauda gbāia jī n je gē daajakē yāaji ò n zūu ē'ēmīia? Ì à jī à nu wa hwaa ashiiwaji, à ladi à nu ò basukukɛji. Di Anuni Dauda ɛkɛnaa be kūkū ò à kpago kaka kawa doo bō, ò à tuhwaana zēzē ò gudoodoobii à busōɔnama susuu, di ò à zùga. Tá wāa hē Daudan, di ò gbāia jī à wee kōtaji'àzo, dun ū à kū gbagba. À kē'ē: Kii kē, à zutɛ Yaliko ha a kpago kaka bo, sa'ai à shia.

Tá Amōnia wā Dauda ba yaa à wusayāaji mōda, di à hindebō gbāian à jēkē'ē: Suliaā tá bee Leobe Zobazo gē jēnaa dubu kadoo kii Maaka jēkɛnaazo dubu doo Tobu gbāiazo dubu wokoi wohwaazo. Tá Dauda ò ò labaii mà, di ò Yoabu zùga'àma

jêekenaazo kôn. Amônia bò à jêe'oolagò à hwaa bikaleema, di Suliaã tá bò Zoban Leobezo Tobu gbãiazo Maaka gbãiazo bee lateẽ à kpɛɛ. Tá Yoabu wà wà jêe'oolagò ò ɛɛ ò kpɛɛzo, di ò Isra'ila jêenaje yāana bòbii ò à zùga à wee kuji Suliaāma. Di ò jêenaa kãa dà ò dako Abisain ò ooũ, di ò à zùga à wee kuji Amōniama. Ì kè: In Suliaã gbada dāmala, ò nu ò oodamama. In Amônia gbada dāmiila kīn, má nua oodaji'mma. Ñ zūuje, wà gō nōgōnia wa gbāia wa Lakii hwaanazo yāaji. Ho tá kè Baanajen yāazo ò kɛ. Di Yoabu jêenaa tá bee'izo à wèe Suliaāma jêezo, di Suliaã be baashì'èè. Tá Amônia wà Suliaã baashì, di à baashì Abisain kīn, à gā hwaaũ, di Yoabu à tò gube, ò wèe Ulusalima.

Tá Suliaã wà Isra'ilaã jêebèe'ama, di à ladì à hàkō. Di Adadezɛɛ gbāia jì, à shì Suliaāzo tá bee Yufulata kawa be, di à wèe Helamu. Sobakin Adadezɛɛ jêenaa be ɛkɛda. Tá Dauda ò ò labaii mà, di ò Isra'ilaã hàkō kōn, ò sàda'azo Yuudāma ò wèe Helamu. Di Suliaã jêe'oolagò'iji, di à gā kōu. Tá àbi baashia Isra'ilaān, di Dauda à dèdè busu gudanaa kasoo sōhia gēɛ jêenaazo dubu kahwaa. Gube wà à jêekena ɛkɛda Sobaki dè. Tá kiina tá bee Adadezɛɛ zōkɛnaa wà Isra'ilaã jêebèe'ama lee, di à leedookè Isra'ilaāzo, à gō à zōkɛnaa. Wasaa Suliaã kù, àta wèe oodaji Amōniama mōda.

Dauda yaa Bashebaji

Tá bōkɛ hwaashì, dii tá kiina ta wee jêekɛji, di Dauda Yoabu jì ò ɛekenaazo Isra'ilaāzo kōn. À Amônia basukukè, di à lòkoci Labaji.

Dauda kīn ì bee Ulusalima. Tá igeè kè, di Dauda kpàtɛɛ ì intɛɛboma, ibi tabii ì ke miima. Tun ke miima gube ì nɛnɛni kee wà, ibi zuuda. Nɛnɛni be nɛnɛni yāan gba, di ì gbān jĩ nɛnɛni be yāalalaji. Di wàa kè'in: Eliamu ni Basheban, Hiti boii Uli nɛn. Di Dauda gbāia jĩ ì shishiji. Tá ì nù, di Dauda intɛɛ'izo, di nɛnɛni be wèè kpɛɛ. Īakīn ì āmawa gbāshĩbò dɛɛzo. Tá ì gbɛeshì, di ì lakpalekè Daudan ì kè ì gbɛeshì.

Di Dauda gbān jĩ Yoabuma ì kè: Hiti boii Uli jĩmama. Di Yoabu ì ì jĩ ì gu. Tá Uli nù, di Dauda Yoabu lahia làla jēekenaazo jēɛzo tá àbi kea. Di Dauda kè'in: Ñ wee kpɛɛ zuuji. Tá Uli bò kii bà, di kii gbān jĩ'in mabenazo. Amaa Uli tà wèè ì bà, kii bà gòò ì iũ ì baanaje zɔckenaazo. Di wàa hɛ Daudan wà kè: Uli tà wee ì baa. Di ì Uli làla ì kè: Maa dǝ n shì jēɛzo dɛɛdɛɛ. Budikpaaji ntà wee kpɛɛda? Uli jinshì'in ì kè: Adaka Isra'ilaāzo Yahudaāzo bee bashekeāu. Ma baanaje Yoabu ì gbāiazo à bee latɛɛũ. Mába zāia mà wee ma bà mà hobee mà imi, mà intɛɛ ma nɛzoa. N betɛkezo mába ho be keaa. Di Dauda kè'in: Ñ gǝ guii kpāia mɔɔ, lahũ má n zugaa. Di Uli gǝ Ulusalima diibeedii dii sɔdidazo mɔɔ. Dauda ì shìshi, ì hobèè ì imì'izo, di Dauda ikàakaa'in. Amaa tá ì bò igeè, ì wèè ì ì ì baanaje kii zɔckenaazo, ìta wèè kpɛɛda. Tá gu dǝ, Dauda lalakè Yoabun, di ì Uli jĩzo. Lalahu beũ ì kè: À Uli di ɛɛ gu tá jēɛ hida, à bo ì kpɛɛ, dun wà ì tu ì ga.

Dii tá Yoabu bi lokocia hwaa beji, di ì Uli dà gu tá ibe dǝ nɔgǝni gbadaā beeũ. Tá hwaa gbāia bò àbi jēɛkea Yoabuzo, à Dauda jēekena kāa dèdɛ. Hiti boii Uli bee à bii.

Di Yoabu gbān jĩ Daudama dun ì jěe yāaladi'in kōn. Ì kè jĩni ben: In n jěe yāaladì kiin kōn nn yǎ, in ì hūngà ì n làla ì kè: Budikpaaji a nù kutu hwaa gu jěezo? Atà dō tá bikamiinaa bata kaa zu'àma teemaa? Ji di Yelubaala ni Abimeleki dè? Baa nuhe di wucicigbɛ ɔ̀u tun Tebeze bika miima, di ì ì dèa? Budikpaaji a nù kutu bika gu lee? In ibe hèmii lee, n he'in ì zɔ̀kɛda Uli, Hiti boii gà mɔ̀. Di jĩni be dà zɛema. Tá ì bòo Dauda gu, yǎa tá Yoabu hèn'in ibe hèn'in kōn. Ì kè: Gbāia bò hwaaũ, àbi gbadamɔ̀awěe guhu, di wa à yà ha à hwaa bikaleema. À kaazunaa bee bika miima, di à kaa hě n gbāia bii tá tɛ, à à gbānkāa dèdɛ. N zɔ̀kɛda Uli, Hiti boii gà mɔ̀. Di Dauda hè jĩni ben: N he Yoabun iba to ho be kɛ'in sebea. Gbāia tá jěe ì à bèe wàta dɔ̀a. Ì jěekɛ hwaa be gbāiazo gbadazo, ì detɛ. N ì gba zūugbada lee. Tá Uli nɛ mà ì zāa gà, ì ɔ̀. Tá ga'odii yǎ, Dauda gbāia jĩ, à shì'izo Dauda bà, di ì gɔ̀ ì nɛ. Ì ni'ě'izo nɔ̀gɔ̀ni, di ho tá Dauda kè be ì kè Baanajen sebe.

Annabi Natā Dauda tōlagaana

Baanaje Natā jĩ Dauda gu. Tá ì bòo, ì kè'in: Nɔ̀gɔ̀ni hwaa kāa di bee hwaa dooũ, gbān doo oohonajen, gbān doo kīn nindenajen. Oohonaje be tāana zo diinazo dake, nindenaje be kīn ba hokan zoa, tāadɔ̀ mɔ̀kɔ̀ni doo kee ibe lù. Di ibe tòo, ì gbakè ì niazo lɛdole ì bà. Àta ho doo bee, àta imi hè dooũ, ita intɛ ì gbɛɛtɔ̀tɔ̀ũ, di ibi maa doo ì ginde nenezɔ̀. Tá nuba ìntɛ kaweenaje be gu, di ìta yadakè ì ì tǎa ko dīi kũ ì gaaũ ì nuba be ladɔ̀zoa, nindenaje

tāadō be ibe shì'ima, ì ì nuba be ladòzo. Di Dauda hūngà oohonaje be yāaji gbagba, ibe kè Natān: Baanaje bee! Gbān tá ho be kè ì kù wà ì dē. Lata ibe kè lee, ìta ì tosaimaa, ì tāa be hindebo kù shì. Di Natā hē Daudan: Mii gbān ben. Baanaje Isra'ilaā Lakii di yāa dii hē ì kè: Ma n kpà Isra'ilaā kii, ma n bò Saulu ooū, di ma n baanaje be baa kpà'mma, ma ì nēa gāmii n ooū. Ma Isra'ilaā Yahudaāzo kpà'mma n gbāia. In bee kēmii mōkō, má ì kāa laakeamii. Budikpaaji n ma yāa shambò? Ho tá mába yaajia nn kè, n Hiti boii Uli dē hēesaazo, n ì nē shì n nē. Nn tò Amōnia ì dē jēē. Tun kpāia hēesaa ba kataa n bama ha abada mōda, dun n ma shambò, n Hiti boii Uli nē shì n nē. Di Baanaje ladì ì yāa dii hē ì kè: N ma! Má toa n ginde baa gbāia yāakōmii. Má n nēa shia'mma, má à kpaa n gbān dooma n ēē, ì intēda'àzo guhuū. N hokè ashiiū. Maakīn má ho be keamii guhuū Isra'ila kōn ēē.

Di Dauda hē Natān: Ma asozezekè Baanajen. Di Natā kè'in: Baanaje n asozeze kàta'mma, mba gaada. Amaa lata n Baanaje shambò gbagba ho be kēāzo, nōgōni tá neneni be ē'nzo ì gaa. Dun Natā wēē kpēē, di Baanaje tò ni be tá Uli nē ē Daudazo geedē. Di Dauda bi Lakii shishia ni be yāaji imijīikezo, gūmōzo ìta intē tēema. Ì bà gbānkpasā māma'iji ì kpatē tēema, amaa ìta yadakēa, mō ìta hobēē'àzoa. Dii schiabōabo ni be gà. Dauda ēkenaa wasaamà, àta zāia à kè'in ni be gà. À kè: Dii tá ni be bee, wa yāahē'in, ìta wa yāamaa. La di wá hea'in tandi ni be gà? Ì yāa zeze kea. Dauda wà ì ēkenaa bi yāa mōkōni hea kōn, di ibe

dǒ ni be gà. Ì à làla ì kè: Ní be gàa? Di à jinshì'in à kè: Ee! Ì gà. Dauda kpàtɛɛ tɛɛma, ì zùu ì yǒɔ kèkè ì ì tuhwaana sɔdì, di ì wèè ì kùtɛɛ Baanajen ì keũ. Tá ì ladì ì wèè kpɛɛ, ì mabɛna làla, di wàa kpà'ima, ibe bèè. Ì ɛɛkenaa ì làla ì kè: Budikpaaji mbi hokea lee? Dii tá ni be bee, n imijĩkè n ò. Tá ì gà tandi, n kpàtɛɛ n hobèè. Ì jinshì'èè ì kè: Dii tá ni be bee, ma imijĩkè ma ò, dun ma kè, ji di dǒ in Baanaje ì ma tosaimaa ì to ni be gɔ bee? Lata ì gà tandi, budikpaaji má imijĩkɛa mɔɔ? Má zāia mà ì beteke būa? Má wada ì gu, amaa ĩa ba ladia ì nu ma gua.

Dauda ì nɛ Basheba jii'è'è, di ì wèè ì intɛɛ'izo. Ì ni'è nɔgɔni, di ì tokpà'in Sulemanu. Baanaje yaa'iji, di ì annabi Natā jĩ ì gu ì tokpà ni ben Yedidia dun Baanaje yaa'iji.

Laba shiā Amɔniama

Yoabu jǽkè Amɔniazo Laba, di ì kii bà shì. Di ì gbāia jĩ Dauda gu ì kè: Ma jǽkè Laba gbāiazo, di ma à itɔtɔgu shì. Jǽkɛda kāa hakɔ tandi, ì nua ì lokoci hwaa beji ì shi. In ba leenda, má shia, wà ma to kpa'in. Di Dauda jǽkenaa hàkɔ kɔn, ì wèè ì kù Labama ibe shì. Wà à jii Mɔlɛki jinali fula gò ì miima, wàa kpà Daudama. Ì gbitee bòo kilo kadoo wokoi, mɔɔ gbɛɛ daajanaa beema. Ì hwaa be hoā nàakɔ kɔnkɔn, di gbāia tá bee gube ì à kùkù ì bò'azo, ì à dà zato jĩũ diga jĩizo zɛɛ jĩizo, mɔɔ ibe tò à bulo bò. Lee ibe kè Amɔni hwaanan kɔn, di ì ladì ì wèè Ulusalima ì jǽkenaaazo kɔn.